



CUMÜN DA SCUOL

Quist protocol es stat publichà dals 3 lügl fin als 2 avuost 2020.
Protestas nu sun entradas ingünas. Il protocol vala dimena sco approvà.

Protocol nr. 1
Radunanza cumünala
dals 29-06-2020, 20:00–22:50 in sala cumünala a Scuol

Preschaints: 101 personas

S-chüsats: Niculin Meyer, Jon Roner, Jan Sedlacek

Giasts: Fadrina Hofmann (Südostschweiz) Dario Müller (RTR), Benedict Stecher (ANR), Mayk Wendt (fotograf)

Actuar: Andri Florineth

Sco scrutinadurs vegnan elets: Giovanin Josty, Urs Lechthaler ed Armon Parolini

Il capo renda attent a l'artichel 7 da la constituziun chi prescriba tanter oter:

- Abels da vuschar sun burgais svizzers sco eir esters chi han ün permiss da domicil.
- Ablas da vuschar sun las personas chi han accumulì il 18avel on e chi sun registradas aint il register dals votants dal cumün.

2020-20 0.1.2 ADMINISTRAZIUN GENERALA | Executiva
Rendaquint
2020.06.29_Credits posteriurs per investiziuns

Fats

Pro las seguintas investiziuns es gnü surpassà l'import deliberà da la radunanza da preventiv dals 10 december 2018:

1. Sanaziun Quadras – Porta (punt Clozza)

I nun es gnü fat ingün proget. L'uffizi da fabrica ha calculà la lavur be rudimentarmaing. Quai es il motiv pel surpassamaint da 25 %. Adattamaint da la chanelisaziun 37 000 francs ed asfaltaziuns da 15 000 francs.

Ils cuosts per tuot l'investiziun importan 251 261 francs. Büdschetats d'eiran 200 000 francs. Perquai ha dad approvar la radunanza ün credit supplementar da 52 000 francs.

2. Sanaziun scuola primara Scuol

Il surpassamaint da cuosts es da declerar sco segua:

- Implant fotovoltaic (var 65 000 francs), decisiun da la suprastanza dals 7 avuost 2019 (protocol nr. 14, affar nr. 2019-114)
- Isolaziun externa: rampa plü largia per persunas cun impedimaint da chaminar (var 30 000 francs)
- Nouva porta pro l'entrada (var 10 000 francs).

Ils cuosts totals as muntan uschè a 756 527 francs e surpassan il credit da 650 000 francs deliberà da la radunanza da preventiv dals 10 december 2018. In quel cas ha la radunanza dad approvar ün credit supplementar da 107 000 francs.

Ponderaziuns

Il capo preschainta ils duos credits supplementars. Dal ravuogl da la radunanza nu vegnan fattas ingünas dumondas e neir ingünas objecziuns.

Discussiun

Dumonda: Üna votanta metta in dumonda il proceder pel permiss da fabrica pel mür in Porta. Il cumün nun ha ni profilà ni publichà quel intent. Perchè nun ha da far il cumün quai? Il cumün nu vess plü co facil mai dat il permiss ad ün privat per far ün simil mür.

Resposta: Il manader da las gestiuns tecnicas piglia posiziun e disch cha'l proget general da la Clozza saja stat publichà e chi nu sajan entradas ingünas protestas. Tuot las masüras chi sun gnüdas realisadas stan in connex culla sgürezza per la zona d'abitar i'l cuntegn lung la Clozza.

Decisiun

Unanimamaing approvescha la radunanza ils duos credits posteriurs. Quistas decisiuns suottastan al referendum facultativ.

2020-21 0.1.2 ADMINISTRAZIUN GENERALA | Executiva
Rendaquint
2020.06.29_Rendaquint cumünal per l'on 2019

Fats

Il rendaquint pel on 2019 es darcheu fich bun, il meglder davo l'on 2015 cur cha no vain surgni la contribuziun unica dal Chantun da 10 milliuns francs in connex culla fusiun. Quai vül dir cha no serrain giò l'on 2019 cun ün resultat fich allegraivel.

Quint da gestiun

Il rendaquint 2019 dal cumün serra cun ün guadogn da 2 647 409 francs. Las entradas importan 51 996 542, las sortidas 49 349 134 francs. No pudain preschantar quist bun resultat adonta cha no vain fat amortisaziuns implü dad 2,049 milliuns francs e rectificà la valur d'ün impraist da 3 milliuns francs.

Quist resultat fich bun es d'ingrazchar a differentes facturs. Pro las entradas nettas da las impostas generalas vaina gnü ün leiv augmaint (13,039 milliuns francs invers 12,619 milliuns dal 2018). Pro las entradas nettas da las impostas specialas es l'augmaint remarchabel (9,171 milliuns invers 6,803 milliuns). Da manzunar sun quia l'imposta fundiaria cun entradas da 5,291 milliuns (invers 3,230 milliuns dal 2018) sco eir l'imposta sün iertas e donaziuns cun 1,263 milliuns (invers 0,038 milliuns dal 2018). Eir las entradas dals fits d'aua d'eiran plü otas co l'on 2018 (4,934 milliuns invers 4,331 milliuns). Tuot quistas entradas nu pudaina spettar minch'on in quist'otezza, impustüt brich las entradas da las impostas specialas ingio cha'l surplü deriva da correcturas dals ons avant respectivmaing da cas unics.

No vain gnü d'üna vart entradas implü ed expensas plü bassas, da tschella vart expensas plü grondas co previs. Ün'expensa plü bassa d'eira p. ex. il deficit net dal sector sandà: el importa 2 611 240 invezza da 2 976 850 francs tenor preventiv. Pro las expensas plü grondas sun da manzunar p. ex. ils cuosts per la rumida da naiv tras terzs chi s'amuntan a 506 238 invezza da 200 000 francs. Il mantegnimaint da las vias champestras ha cuostü 420 190 invezza da 180 000 francs.

Quint d'investiziun

Las investiziuns nettas dal cumün importan 6 634 542 invezza da 7 094 000 francs tenor preventiv. Üna o l'otra investiziun nu vaina realisà resp. vaina spostà, o il proget nun es gnü finì dal 2019. Da manzunar es quia la sanaziun da la Punt Gurlaina: il termin d'execuziun es gnü spostà pel on 2020.

Las masüras d'urgenza in connex cullas auazuns da la prümavaira 2019 nu d'eiran previssas aint il preventiv ed ans han chaschunà cuosts brüts dad 1,6 milliuns francs.

Ils gronds «baccuns» da las investiziuns d'eiran ils seguaints: 805 440 francs per vias cumünalas (tenor preventiv 1 170 000 francs), 665 392 francs pel provedimaint d'aua (tenor preventiv 890 000 francs), 1 132 064 francs pel allontanamaint da l'aua persa ed 1 816 599 francs per dons da strasoras ed auazuns (tenor preventiv 450 000 francs). Il imports manzunats quia sun cuosts nets, quai vuol dir cha contribuziuns da terzs, contribuziuns chantunalas e.u.i. sun fingià resguardadas.

Bilantsch

Üna cifra fich importanta per valütar la situaziun finanziala es l'aigna finanziaziun. Quella demuossa scha'l cumün saja abel da finanzia las investiziuns cun agens mezs. Daspö la fusiun vaina gnü (cumulà e sainza la contribuziun chantunala per la fusiun) ün suravanz da l'aigna finanziaziun da 5,2 milliuns francs, e quai pro investiziuns nettas da 36,3 milliuns francs. No dovrain eir in avegnir fich buns resultats dals quints economics. Inschinà nu vaina aigna finanziaziun avuonda per pudair realisar las investiziuns annualas sainza augmentar il chapital ester massa ferm.

La circulaziun monetara dal cumün es leivmaing positiva. I sun dimena entrats daplüs raps co cha'l cumün ha dat oura. In detagl less quai dir chi sun fluits var 10,4 milliuns francs tras l'attività operativa, per investiziuns sun sortits var 6,6 milliuns francs e per la finanziaziun var 3,1 milliuns francs. Uschè resulta totalmaing ün augmaint dal fondo munaida da 0,7 milliuns francs.

La cifra indicativa «debit net per abitant» vain dovra da sco masüra pels debits. Il cumün da Scuol nun ha ingüns debits, dimpersè üna facultà netta chi'd importa var 4 100 francs per abitant. Per conguar: tuot ils cumüns in Grischun chi'd han introdüt il model da contabilità armonisà MCA2 (2018: totalmaing 104 cumüns) vaivan in media üna facultà netta da var 6 700 francs.

Ponderaziuns

Discussiun

Dumonda: In connex cul quint d'investiziun fa ün votant quatter dumondas a la supranza e duos propostas a la radunanza. I's tratta dal proget „Sanaziun punt Gurlaina“, conto 3420.5010.01. I segua il text original da la charta:

„Eu n'ha quatter dumondas a la Supranza cumünala :

1. *Che ponderaziuns ha fat la Supranza cumünala cur chi'd es gnü actual la sanaziun da la punt da Gurlaina ?*
2. *Qualas pretaisas concretas ha fat la Supranza cumünala a l'indschegner in connex cun surdar l'incumbenza da progettar la sanaziun da la punt ?*
3. *Co es gnüda preparada e fatta la submissiun e che criteris e referenzas ha pretais la Supranza cumünala per surdar quista lavur complexa a l'indschegner ?*
4. *Esa gnü fat ün inspecziun dal stadi da la punt tras perits **avant** co cumanzar a progettar, quai chi'd es üsità pro similas sanaziuns da punts ?*

*I para cha la punt gnüa uossa a cuostar 3 jadas daplù co il prüm credit chi'd es gnü fat bun a la radunanza da büdschet 2018. Sbagls pon capitar. Ma mincha indschegner es tenor las normas dal SIA responsabel da tgnair aint ils cuosts dal preventiv chi'd es gnü elavurà dad el e per eventuels sbagls ha mincha indschegner üna sgüranza da respunsabilità. Id es seguond meis avis da far uossa tuot il pussibel per evitar ulteriur don a charg da nos cumün e quai **avant** co suottametter a la cumünanza d'urna ün terz credit per listess object.*

Eu fetsch perquai las seguintas propostas :

1. *Il rendaint 2019 dess gnir fat bun cun resalv dals imports sbuorsats per la sanaziun da la punt Gurlaina. Otramaing vaglian quels sco fat buns e dat dis-charg.*
2. *Avant co suottametter ün ulteriur credit per la sanaziun da la punt Gurlaina dess la cumischion sindicatoria – eventualmaing cun sustegn da perits e da sgüranzas chi vegnan in dumonda – controllar ed analisar il proceder da la submissiun per las lavurs d'indschegner ed eventualas respunsabilitats in connex cul preventiv e culs surpassamaints da cuosts.*

(Quist proceder es dal rest eir l'avis da l'uffizi da cumüns dal chantun Grischun sign. Thomas Kollegger e Simon Theus culs quals eu n'ha telefonà)

*Eu dun a protocol ch'eu nu fetsch hoz ingüns rimprovers o incuolpaziuns. Per mai esa però important cha'l man public surpiglia **be ils cuosts effectivs per las lavurs**. Ils cuosts chaschunats tras eventuals sbagls dessan però gnir surtuts dals eventuals cuolpabels o da lur sgüranzas.*

Eu giavüsch cha nos capo detta la pussibilità a la radunanza da vuschar giò sur da mias duos propostas surmanzunadas. Per cha mias dumondas e propostas possan gnir protocoladas uschea sco ch'eu tillas n'ha formuladas tillas surdun eu per scrit al capo ed a l'actuar."

Resposta: Il capo argumantescha cha la radunanza cumünala dals 10 december 2018 ha deliberà 1 460 000 francs e la radunanza cumünala dals 9 december 2019 ün credit supplementar da 740 000 francs, tuot in tuot da 2,2 milliuns francs per la sanaziun da la punt Gurlaina. Ils s-chars 46 000 francs chi sun gnüts investits l'on passà han stuvü gnir contagiats in quel conto. I nu fa ingün sen dad approvar quist rendaquint e da far üna resalva pel conto 3420.5010.01. Ils sclerimaints detagliats ston gnir fats il prüm.

La majorità da las votantas e dals votants preschaints decida da trattar la proposta e da vuschar la-supra.

Dumonda: Ün votant propuona da vuschar in scrit davart las duos propostas fattas. Quai vain sustegnü d'üna gronda majorità dals preschaints, tant cha tenor l'artichel 34 al. 4 da la constituziun cumünala haja da gnir votà in scrit.

Ils preschaints sun perinclets da far las duos votaziuns insembel cun ün scrutin.

Il resultat da la votaziun in scrit es il seguint:

1. Proposta: Il rendaquint 2019 dess gnir fat bun cula resalva dals imports sbuorsats per la sanaziun da la punt Gurlaina.

Cedlas entradas	95
Cedlas vödas	1
Cedlas valablas	94
Majorità	48
Schi	59
Na	35

2. Proposta: Avant co suottametter ün ulteriur credit per la sanaziun da la punt Gurlaina dess la cumischiun sindicatoria – eventualmaing cun sustegn da perits e da sgüranzas chi vegnan in dumonda – controllar ed analisar il proceder da la submissiun per las lavurs d'indschegner ed eventualas respunsabilitats in connex cul preventiv e culs surpassamaints da cuosts.

Cedlas entradas	95
Cedlas vödas	1
Cedlas valablas	94
Majorità	48
Schi	64
Na	30

Uschè cha la radunanza accepta las duos propostas.

Decisiun

In basa als fats ed a las ponderaziuns decida la radunanza unanimamaing:

1. dad approvar il quint da gestiun e quel d'investiziun per l'on 2019 sco eir il bilantsch pels 31 december 2019 culla resalva dal conto 3420.5010.01 „Sanaziun punt Gurlaina“;
2. da dar dis-charg a las instanzas politicas.

Per finir ingrazcha il capo a tuot quels e quellas chi s'han s'ingaschats a favur dal cumün.

2020-22 0.1.2 ADMINISTRAZIUN GENERALA | Executiva **Rendaquint** **2020.06.29_Rendaquint da la meglioraziun generala da Sent** **(a cogniziun)**

Fats

Las sortidas importan CHF 30 902.95 e las entradas CHF 23 214.90, tant chi resulta ün s-chavd da CHF 7 688.05. Il cumün ha pajà fin la fin dal 2019 CHF 883 112.45 vi da la meglioraziun da Sent.

Ponderaziuns

La radunanza ha be da tour cogniziun dal rendaquint da la meglioraziun generala da Sent.

Decisiun

La radunanza piglia cogniziun dal quint economic e dal bilantsch da la meglioraziun generala da Sent.

2020-23 3.4.2 CULTURA, SPORT E TEMP LIBER, BASELGIA | Temp liber **Senda Clemgia Scuol** **2020.06.29_Proget prüma fasa**


Fats

La senda e las punts da la Clemgia ston gnir refattas causa ils dons da las strasoras dals ultims ons. Il büro d'indschegners Canclini + Partner S.c.r.l. ha elavurà ün concept pella prüma fasa. Cun quellas masüras d'urgenza as pudessa dar liber provisoricamaing la chavorgia sco senda alpina pella stà 2020 e quai davent da Vulpera Dadora.

Singulas lavurs sco quellas d'indschegner, masüras d'urgenza, lavurs da geometer e lavurs da pulizia dal spelm sun gnüdas fattas fingià l'utuon passà ed han cuostü s-chars 64 000 francs. Davo quai ha

analisa il cumün – insembel cul büro d'indschegners Canclini + Partner S.c.r.l. – la situaziun, il concept e las lavurs decisivas pel büdschet 2020. I dà quatter differentas variantas per surpassagis resp. punts. Sainza surpassagis nu esa pussibel da trafichar la chavorgia uschè chi'd es da far quistas lavurs.

In basa als sclerimaints e davo il stüdi da las quatter variantas propuona la suprastanza la varianta da fabricar üna punt ad arch in lain (Holz-Bogenbrücke) cun üna via averta da lain. La proposta as preschainta sco segua:



Id es previs da far in tuot duos invezza da be üna punt. Üna (a schneistra sül plan, segnà cul rinch co-tschen) per rivar da la Clemgia fin pro'l inchaschamaint sco rimplazzamaint da la punt existenta chi stess gnir renovada. La seguonda punt pro'l inchaschamaint (dretta sül plan, segnà cul rinch co-tschen) per rivar sülla senda existenta da Clemgia.

Fabricar duos punts identicas al listess mumaint ha l'avantag chi's spargna cuosts (installaziuns, svouls d'elicopter ed eir pella progettaziun). In cifras voul quai dir: üna singula punt cun quista varianta cuostess 191 000 francs. Schi gnissan fabricadas tuottas duos il listess mumaint, schi cuostess quai 180 000 francs per punt, dimena in tuot 360 000 francs. Quai füss ün respargn da 22 000 francs. Implü füssa d'avantag scha las lavurs pudessan gnir fattas in üna jada e na in etappas causa chi'd es da far per tuottas duos punts las listessas lavurs.

Ponderaziuns

Culla realisaziun da quist proget es garanti l'access d'avent da Plan da Funtanas/Avrona lung la chavorgia da la Clemgia fin davo la punt ingio cha la via as sparta e ch'üna senda maina a Vulpera Dadora. Da là d'avent as poja lura chaminar fin giò'n Gurlaina.

Per realisar la prüma fasa da la senda da Clemgia esa fat quint cun cuosts da 460 000 francs. Per ingon sun büdschetats be 100 000 francs. L'uffizi pel trafic na motorisà (Amt für Langsamverkehr) as partecipescha cun ün terz dals cuosts da fabrica da quist proget. Per quai pretendna però cha'l cumün progettescha eir la reparatura da la part pro l'entrada illa chavorgia da la Clemgia in Gurlaina.

La suprananza propuona a la radunanza cumünala da deliberar il credit da 460 000 francs pel proget da la senda Clemgia. In quel cas dvainta obsolet il credit da 100 000 francs gnü deliberà da la radunanza cumünala als 9 december 2019.

Discussiun:

Dumonda: Ün votant vül savair schi saja previs da far üna construcziun da las punts chi cumporta eir strasoras, vül dir schi vegn bler material cul flüm.

Resposta: Las punts sun plazzadas plü ot, tant chi'd es daplü lö suotvart pel material per passar tras, disch il manader da las gestiuns tecnicas.

Dumonda: Es gnüda fatta üna calculaziun detagliada dals cuosts?

Resposta: Il manader da las gestiuns tecnicas preschainta ils detagls, tant cha quista dumonda es sclerida.

Dumonda: Cun quants cuosts esa da far quint per metter ad ir la part pro l'entrada illa chavorgia da la Clemgia in Gurlaina?

Resposta: Il capo disch cha per quella lavur saja da far quint cun var trais milliuns francs.

Decisiun

La radunanza deliberescha unanimamaing 460 000 francs per la sanaziun da la senda Clemgia. Quista decisiun suottasta al referendum facultativ.

2020-24 8.4.0.1 ECONOMIA PUBBLICA | Implants turistics (in general) Bogn Engiadina Scuol (BES) SA 2020.06.29_Contribuziun à fonds perdu causa il virus Corona

Fats

Causa il virus Corona ha gnü da gnir serrà il Bogn Engiadina als 13 marz. Cumbain chi han annunzchà lavur cuorta e chi han surgnü ün credit „Covid-19“ da la banca stona far quint cun ün deficit da gestiun considerabel.

Perquai ha decis il cussagl administrativ da dumandar al cumün per üna contribuziun à fonds perdu dad ün milliun francs.

Ponderaziuns

In vista a l'importanza turistica ed economica dal Bogn Engiadina Scuol per tuot la regiun es la suprananza da l'avis chi saja da sustgnair quista dumonda. Ella propuona perquai a la radunanza dad approvar la contribuziun à fonds perdu maximala dad 1 milliun francs. Quel import vain dovrà be schi tils manca la liquidità. Pel mumaint hana bunas frequenzas, tant chi's po suppuoner chi nu gnia dovrà tuot l'import.

Discussiun:

Ingüna.

Decisiun

Cun üna cuntravusch approvescha la radunanza il credit pel BES. Quista decisiun suottasta al referendum facultativ.

2020-25 8.7.1 ECONOMIA PUBLICA | Electricità Rait electrica 2020.06.29_Taxa a favur da la comunità pel 2021

Fats

In basa a l'artichel 1 al. 2 da la ledscha d'energia dal cumün da Scuol dals 26 marz 2017 ha da fixar la radunanza cumünala minch'on la taxa per l'on davo, quai i'l rom tanter 0 e 4 raps per ura kilowatt.

Ponderaziuns

La radunanza cumünala ha da decider sch'ella voul laschar la taxa a favur da la comunità pel 2021 sco fin qua, voul dir sün 1.5 raps per ura kilowatt. Cun quai es entrà dal 2019 bundant 1 milliun francs. Schi's augmantess quella taxa per ün rap (sün 2.5 raps) vuless quai dir var 650 000 francs daplü entradas pel cumün.

La suprastanza racumonda a la radunanza da laschar la taxa a favur da la comunità per l'on 2021 sco fin qua sün 1.5 raps pro ura kilowatt.

Discussiun:

Ingüna.

Decisiun

Sainza cuntravusch approvescha la radunanza la proposta da la suprastanza.

Sanaziun da la punt da Gurlaina

Il capo declera la situaziun actuala a regard la punt da Gurlaina. Il stadi da la punt da Gurlaina es pês co quai chi's vaiva pensà. Quai s'haja però constatà pür davo chi vaivan cumanzà a metter sü la puntinada. A man da quai haja dat üna bloccada da fabrica ed i sun gnüts fats divers sclerimaints.

La radunanza da preventiv dals 10 december 2018 ha deliberà ün credit dad 1,46 milliuns francs. Als 9 december 2019 ha deliberà la radunanza ün credit supplementar da 740 000 francs. In tuot esa gnü deliberà ün credit da 2,2 milliuns francs.

I dà quatter variantas per la punt da Gurlaina:

1. sanar la punt existenta (demontar e metter in Gurlaina per tilla sanar e davo montar darcheu)
2. üna nouva punt
3. allontanar la punt
4. sanar la punt existenta (cun concessiuns)

Discussiun:

Dumonda: Ün votant critichescha cha la populaziun nu saja mai gnüda orientada lasupra.

Resposta: Il capo disch cha la suprananza saja gnüda orientada eir be d'incuort davart ils detagls.

Ponderaziun: Quista punt es ün simbol pel cumün, manaja ün preschaint. Perquai tilla füssa in mincha cas da mantgnair. Schi vess da gnir fatta üna punt nouva, schi füssa tenor el da far üna concorrenza publica d'ideas.

Dumonda Ha il cumün üna sgüranza da responsabiltà per quista punt?

Resposta Il manader da las gestiuns tecnicas disch da na.

Areal da Trü ed infrastruttura

In november 2019 ha publichà il cumün la „retschercha davart l'avegnir da l'areal da Trü“. Tuot las persunas interessadas, independentamaing da l'età e da la naziunalità d'eiran invidadas d'implir oura il questunari fin als 31 december 2019.

La cumischiun „infrastructuras cumünalas“ ha evaluà ils s-chars 500 questunaris chi sun gnüts inoltrats.

Id es previs dad orientar a la cumischiun Trü ed als partecipants da las ideas inoltradas dūrant il mais lügl. In avuost dess gnir orientada la populaziun in üna radunanza d'infuormaziun davart ils resultats dal questunari.

Virus Corona, COVID-19

Il virus Corona e' l' „Lockdown“ següaint han miss our d'funcziun bleras chosas. Il cumün ha installà subit ün stab da crisa. Quel es stat permanentamaing in contact cul stab da crisa chantunal.

Intant s'ha balchada la situaziun ed i's po be sperar chi nu gnia üna seguonda uonda d'infecciuns.

Il capo ingrazcha a tuot la populaziun per l'incletta ed a las instanzas per la buna collavuraziun.

Institut Otalpin Ftan (IOF)

Oriundamaing d'eira previs da suottametter a la cumünanza d'urna dals 17 mai 2020 la dumonda per ün impraist a l'Institut Otalpin Ftan. Causa il virus Corona ha stuvü gnir annullada la radunanza cumünala dals 23 marz, tant cha quella votaziun sto gnir spostada. Ils respunsabels da la scoula han comunicà cha las finanzas pel prossem on da scoula 2020/21 sajan tant inavant sgüradas. La supranza ha pretais da l'IOF chi sclerischan amo diversas dumondas. Subit cha quists sclerimaints sun avantman po decider la supranza scha la dumonda per prolungar l'impraist existent e per dar ün ulteriur impraist vegnan suottamissas a la cumünanza d'urna per decider.

CUMCO (WEKO)

Il Chantun ha decis in collavuraziun culla Regiun Engiadina Bassa Val Müstair per accommodamaints cullas impraisas da fabrica. Las impraisas sun involvadas illas inquisiziuns da la CUMCO davart il cartel da fabrica. L'on passà sun gnüts conclüs accommodamaints cullas firmas da catram. Davo avair dedüt las spaisas dal giurist ha surgni il cumün tuot in tuot ün'indemnisaziun da s-chars 230 000 francs.

Termins provisorics

27-07-2020	Radunanza d'orientaziun (votaziun a l'urna dals 27-09-2020)
01-08-2020	Festa dals 1. avuost 2020 (annullada causa Corona)
Avuost 2020	Radunanza d'orientaziun areal da Trü
27-09-2020	Votaziun a l'urna
October 2020	Eventualmaing radunanza d'orientaziun (votaziun a l'urna dals 29-11-2020)
29-11-2020	Votaziun a l'urna
14-12-2020	Radunanza da preventiv pel 2021

Institut Otalpin Ftan

Ün votant es da l'avis cha'l cumün saja respunsabel per la scoula populara e cha la scoula media da l'Institut Otalpin Ftan suottastetta al Chantun. Il cumün stuvarà decider üna jada quant important cha la scoula saja pel cumün e quant ch'el vöglia pajar.

Il capo declera cha l'augmaint da la valur (Wertschöpfung) saja calculà cun var 5 milliuns francs l'on. Passa 500 000 francs in chascha il cumün minch'on da las impostas da las impiegadas e dals impiegats. L'IOF ha üna fich gronda importanza sco scoula media per nos cumün ed eir per nossa regiun. La strategia chantunala nun es tant optimistica per l'IOF.

I vain fatta la remarcha chi manca la fiduzcha i'ls respunsabels da l'IOF. Avant pac temp dovraivan duos milliuns, uossa tuot in d'üna jada vaja eir sainza. La comunicaziun nun es transparenta.

1. avuost, fös artificials

Üna votanta giavüscha cha la supranza as fetscha impissamaints davart ils fös artificials. Quai dvainta vieplü ün problem. Eir a Silvester esa stat ün grond disturbi. Ils rests da las raketes sun uossa illa prada. I dà alternativas cun glüms in fuorma d'üna „laser show“ chi sun fich attractivas. La supranza es da l'avis cha'l cumün pudess spordscher als 1. avuost ed a Silvester/Büman üna „laser show“ per tuot la populaziun. Il cumün nu po impedir ils fös artificials privats.

Hotel Crusch Alba S-charl

I vain fatta la dumonda scha'l Hotel Crusch Alba in S-charl vegna drivi quista stà. Il capo respuonda ch'el nu sapcha quai, ma cha'l cumün vess grond interess scha la gestiun füss averta.

Rendaquint

Ün votant ingrazcha a tuot ils respunsabels ed al personal cumünal per lur buna lavur. Il resultat dal rendaquint demuossa chi'd es gnü lavurà fich bain.

Il capo:

L'actuar:

Christian Fanzun

Andri Florineth